



Në mbështetje të nenit 5, paragrafi 1, nënparagrafi 1.1, pika 1.1.1, nenit 12 paragrafi 1, nënparagrafi 1.5 dhe nenit 22, paragrafi 3, të Ligjit Nr.08/L-017 për Agjencinë për Parandalimin e Korrupsionit, nenit 21 paragrafi 2 të Ligjit nr. 06/L-011, për Parandalimin e Konfliktit të Interesit në Ushtrimin e Funkcionit Publik, neni 11, paragrafi 4, i Rregullores Nr. 03/20023 për Procedurat për Hetimet Administrative në Agjencinë për Parandalimin e Korrupsionit, Drejtori i Agjencisë për Parandalimin e Korrupsionit, me datë 10.05.2024, nxjerrë këtë:

V E N D I M



- I. Mbyllet rasti AKK-DPKI-06-513/24, lidhur me Konkursin Publik Nr. Prot.:10089, të datës 13.12.2023, për Punëtor Social, Klinika e Pediatriisë, për shkak se nuk ka prova të mjaftueshme që e argumentojnë dyshimin e arsyeshëm për ekzistimin e konfliktit të interesit.
- II. Ky vendim është përfundimtar në procedurën administrative dhe i njëjti publikohet në uebfaqen zyrtare të Agjencisë për Parandalimin e Korrupsionit.

A r s y e t i m

I. Rasti i hapur nën dyshimin për konflikt të interesit lidhur me Konkursin Publik Nr. Prot.:10089, të datës 13.12.2023, për Punëtor Social, Klinika e Pediatriisë, është trajtuar sipas procedurës së paraparë me Ligjin nr. 06/L-011, për parandalimin e konfliktit të interesit në ushtrimin e funksionit publik (në vijim: Ligjit për Parandalimin e Konfliktit të Interesit).

Ky rast ka filluar të trajtohet pas informatës së pranuar nga jashtë (në vijim: raportuesi i rastit), ku ngritën dyshime për konflikt të interesit për zyrtarin Skender Shabani, Shef i Personelit në Qendrën Klinike Universitare të Kosovës (QKUK): “[...] lidhur me konkursin për punëtor social në Klinikën e Pediatriisë në Qendrën Klinike Universitare të Kosovës, në të cilin është pranuar H.SH.A., motra e shefit të personelit, Skender Shabani. [...]”. Tutje në kërkesë të raportuesit të rastit thuhet se, ‘... dokumenti Vendim mbi Përvojën e Punës, [...] është përpiluar nga H. A. ndërsa është nënshkruar nga Skender Shabani - vëllau i H.SH.A. Gjithashtu, ‘gjatë këtij konkursi, në të cilin është pranuar H.SH.A. si punëtor sociale në Pediatri, anëtarët e komisionit vlerësues për punën e tyre i raportojnë Skender Shabanit, pasi i njëjti mban pozitën e shefit të personelit në QKUK’.

Agjencia për Parandalimin e Korrupsionit (në vijim: Agjencia), konform dispozitave të Ligjit për Parandalimin e Konfliktit të Interesit, përmes shkresës zyrtare: APK-DPKI-06-526/24, ka njoftuar zyrtarin publik, z. Skender Shabani lidhur me fillimin e procedurës për shqyrtimin e gjendjes së mundshme të konfliktit të interesit.

Më pas, me qëllim të sqarimit të plotë të kësaj situate është organizuar dhe mbajtur një takim më zyrtarin në fjalë, me ç'rast i njëjti është njoftuar me pretendimet e raportuesit të rastit si dhe me informatat që posedon Agjencia lidhur me këtë rast. Pala ka paraqitur qëndrimet e veta lidhur me rastin në fjalë duke theksuar se: *‘Unë si Shefi i Sektorit të Personelit në QKUK, prej fillimit të konkursit me datë 13.12.2023 deri në përfundimin e rezultateve ligjore të shpallura nga komisioni rekrutues, nuk kam qenë pjesë e komisionit, nuk kam qenë nënshkrues i kontratës’.*

Gjithashtu, në kompletim të dokumentacionit dhe sqarimit të mëtutjeshëm të kësaj situate, Agjencia ka kërkuar dhe mbledhur dokumentacionin e nevojshëm për trajtimin e rastit në fjalë.

Pas trajtimit të të gjithë informacionit dhe dokumentacionit në dispozicion nga Agjencia, nuk rezulton që zyrtari Skender Shabani në ndonjë fazë të procesit të rekrutimit të ketë marrë pjesë në ndonjë vendimmarrje apo çaste paraprake të cilat mund të ishin thelbësore dhe përcaktuese në përmbajtjen përfundimtare të aktit apo kontratës, sa i përket konkursit në fjalë.

Fillimisht, me nenin 6 të Ligjit për Parandalimin e Konfliktit të Interesit është përkufizuar nocioni i konfliktit të interesit, ashtu që:

“Konflikti i interesit lind nga një rrethanë në të cilën zyrtari ka interes privat, që ndikon, mund të ndikojë ose duket se ndikon në kryerjen me paanshmëri dhe objektivitet të detyrës së tij zyrtare”.

Ndërsa me dispozitën e nenit 17 [Deklarimi rast për rast i interesave private të zyrtarit], paragrafi 1 të Ligjit për Parandalimin e Konfliktit të Interesit është përcaktuar se:

“1. Çdo zyrtar gjatë ushtrimit të funksionit të tij publik, në bazë të njohurive të tij dhe në mirëbesim, detyrohet që të bëjë vetëdeklarimin paraprak, rast për rast, të ekzistencës së interesit të tij privat ose të personave të afërm me të lidhur me vendimmarrjen në një çështje të caktuar, që mund të bëhet shkak për lindjen e një konflikti të interesit dhe të tërhiqet nga kjo vendimmarrje.”

... lidhur me nenin 3 paragrafi 1, nënparagrafi 1.2 të Ligjit për Parandalimin e Konfliktit të Interesit, me të cilin është përkufizuar se:

“interesi privat i personit zyrtar - nënkupton çfarëdo përparësie për personin zyrtar, familjen e tij, të afërmit, miqtë dhe personat apo organizatat me të cilat ai ka pasur apo ka marrëdhënie afariste”,

si dhe me nën-paragrafin 1.6 të këtij neni me të cilin është përkufizuar se:

“person i afërm me zyrtarin është - bashkëshorti ose personi që bashkëjeton, të afërmit në vijë të drejtë të gjakut pa kufizime, të afërmit në vijë të tërthortë deri në shkallën e katërt, adoptuesi, i adoptuari, i afërmi në gjini të krushqisë deri në shkallën e dytë si dhe çdo person fizik apo juridik i cili ka pasur ose ka një lidhje të përbashkët interesi privat pasuror ose jopasuror me zyrtarin.

Ndërsa dispozita e nenit 3, paragrafi 1, nënparagrafi 1.12 të Ligjit për Parandalimin e Konfliktit të Interesit, e definon nocionin vendimmarrje si:

“çasti i fundit i procesit vendimmarrës gjatë të cilit vendoset përmbajtja përfundimtare e aktit apo kontratës si dhe ato çaste paraprake të vendimmarrjes të cilat janë thelbësore dhe

përcaktuese në të cilat pjesëmarrja, ndikimi dhe qëndrimi i zyrtarit përcaktojnë përmbajtjen përfundimtare të aktit apo kontratës si dhe çdo veprim i zyrtarit në ushtrimin e funksionit publik.”

Kësisoj, Agjencia ka pasur parasysh të gjitha pretendimet e raportuesit të rastit, veçanërisht atë lidhur me *Vendimin mbi Përvojën e Punës të H.SH.A.*, por edhe akteve (njoftimeve) tjera ekuivalente (të gjitha dokumentet në fjalë janë pjesë e dosjes sonë), me ç’rast në kërkesën e Agjencisë për sqarim, zyrtari Skender Shaban njofton (me shkrim) se, ‘...të gjitha vendimet për përvojën e punës i ka përgatitur zyrtari/ja në QKUK në bazë dëshmime sipas legjislacionit në fuqi, unë si Shef i Sektorit të Personelit në QKUK, i kam nënshkruar sipas detyrës zyrtare’.

Pra, në cilindo rast, vetëm formalizmi (nënshkrimi) i përmbajtjes së gatshme të *Vendimit mbi përvojën e punës* se H.SH.A. apo njoftimit për rezultate të intervistës, nga Skender Shabani (e ku mungon çfarëdo ndikimi apo vlerësimi subjektiv nga ana e tij në ato dokumente), nuk përbën ‘*çast të fundit të procesit vendimmarrës gjatë të cilit vendoset përmbajtja përfundimtare e aktit apo kontratës e as çast paraprak të vendimmarrjes i cili është thelbësor dhe përcaktues [...] në përmbajtjen përfundimtare të aktit apo kontratës*, prandaj situata e tillë nuk bie ndesh me dispozitat e sipërcituara të Ligjit për Parandalimin e Konfliktit të Interesit.

II. Agjencia vendosi si në pikën III. të dispozitivit të këtij vendimi, duke u bazuar në nenin 22 [*Procedura administrative e Agjencisë për rastet e konfliktit të interesit*], paragrafi 12 të LPKI-së, me të cilin është përcaktuar se: “*Të gjitha vendimet që i nxjerr Agjencia lidhur me konfliktin e interesit në ushtrimin e funksionit publik dhe shkeljen e dispozitave të këtij ligji, përfshirë veprimet e ndaluara ose të kufizuara në ushtrimin e funksionit publik, ushtrimin e veprimtarive të tjera, papajtueshmëritë në ushtrimin e funksionit publik, duhet të respektohen nga zyrtarët dhe institucionet përgjegjëse. Ato bëhen publike në faqen zyrtare të internetit të Agjencisë.*”, si dhe paragrafin 15 të këtij neni, me të cilin është përcaktuar se: “*Vendimet e Agjencisë në lidhje me konfliktin e interesit janë përfundimtare në procedurë administrative.*”

Nga sa u tha më lartë, u vendos si në dispozitiv të këtij vendimi.

Vendimi iu dërgohet:

- Zyrtarit të lartë publik
- Drejtorit të DPKI- së
- Z./znj. (zyrtari përgjegjës)

Yll BULESHKAJ
Drejtori i Agjencisë për
Parandalimin e Korrupsionit